



RASHIDILHADI (kanan) menjelaskan situasi semasa operasi mencari dan menyelamat kepada ahli keluarga enam pemancing termasuk tekong di Pejabat APMM Zon Maritim Kemaman, semalam.

Ombak 5 meter tak halang SAR

Usaha kesan enam pemancing termasuk tekong tak pulang sejak Isnin lalu diteruskan

Kemaman

Operasi mencari dan menyelamat (SAR) bagi mengesan enam pemancing termasuk tekong yang tidak pulang selepas keluar ke laut sejak Isnin lalu diteruskan semalam dengan kawasan sektor pencarian diperluaskan hingga 577.42 batu nautika persegi dari perairan Kemaman.

Pengarah Zon Maritim Kemaman, Komander Maritim Rashidilhadi Abdul Rashid berkata, seramai 70 pegawai dan anggota terlibat dalam operasi SAR hari kedua bermula jam 7 pagi semalam.

"Kawasan pencarian kini tertumpu di perairan Kuantan dan Pulau Tioman di Pahang hingga Kerteh, Terengganu dengan pembabitan dua aset laut Maritim Malaysia iaitu kapal KM Pekan serta KM Gemia dan satu pesawat udara AS365N3 Dauphin dari Stesen Udara Maritim Subang (SUMS).

"Angin kencang, ombak setinggi hampir lima meter dan laut bergelora yang melanda perairan ketika ini agak menyukarkan pasukan penyelamat di laut untuk mengesan mereka, malah penglihatan dari udara ke permukaan laut



Kawasan pencarian kini tertumpu di perairan Kuantan dan Pulau Tioman di Pahang hingga Kerteh, Terengganu dengan pembabitan dua aset laut Maritim Malaysia iaitu kapal KM Pekan serta KM Gemia dan satu pesawat udara AS365N3 Dauphin dari Stesen Udara Maritim Subang (SUMS)"

Rashidilhadi Abdul Rashid

juga agak terhad disebabkan hujan lebat ketika ini," katanya dalam sidang media di sini, semalam.

Enam pemancing dan tekong itu ialah Mohd Hafizol Hisham Zakaria, 29, Mohd Samerin Suhaimi, 29, Muhammed Hazim Luqman Zakaria, 19, Rosidi Mohamad, 22, Mohamad Shahrul Ainmie, 19, dan Mohamad Zukarnain Mohamat Nor, 20.

Mereka sepatutnya pulang petang kelmarin namun Agensi Penguatkuasaan Maritim Malaysia (APMM) menerima lapo-

ran daripada ahli keluarga selepas keenam-enam mereka gagal dihubungi.

Susulan itu, Maritime Rescue Sub-Centre (MRSC) Kuantan sudah mengaktifkan dan mengkoordinasikan operasi di laut pada jam 3.15 petang kelmarin dengan sektor pencarian hingga 250 batu nautika namun hingga kini belum menemui sebarang petunjuk.

Mengulas lanjut, Rashidilhadi berkata, pihaknya juga menghubungi Tentera Laut Diraja Malaysia (TLDM) yang berpangkalan di Tanjung Gelang, Kuantan, Pahang dan Polis Marin untuk bekerjasama dalam operasi itu.

Beliau juga berharap pemancing akan menggunakan *Personal Locator Beacons* (PLB) sebagai langkah keselamatan kerana ia akan memudahkan operasi SAR sekiranya berlaku kejadian tidak diingini di laut.

"Harga PLB ini tidak terlalu mahal antara RM300 hingga RM800 sahaja namun fungsinya sangat penting dalam memberi maklumat lokasi yang tepat, sekali gus membantu pasukan penyelamat menjumpai mereka dalam jangka masa yang cepat," katanya.